

浙江通志

浙江省圖


6

福建界

江西界

西

江南界



中华书局




浙江省圖

清雍正朝

浙江通志

6



中华书局

敕修《浙江通志》卷一百十

封 爵

五服之章，天所以命有德也。《礼》曰：以德诏爵，以功诏禄，盖时庸展亲，必有德者称焉。浙自於越启疆以来，凡食采于兹土者多矣，惟文武、忠孝能世其家者，足光简策。今裁以正史，间采旧志，不僭不滥，著于篇。志封爵。

夏

《史记·越世家》：夏后帝少康之庶子，封于会稽，以奉守禹之祀。文身断发，披草莱而邑焉。

《吴越春秋》：少康封庶子於越，号曰无余。无余传世十余，禹祀绝。有人生而言语，指天向禹墓曰：我无余君之苗末，方修前君祭祀，复我禹墓之祀，为民请福于天，以通鬼神之道。众悦，因共封立以承越君之后，号曰无壬。

周

《史记·越世家》：越王句践，其先禹之苗裔，二十余世至于允常。允常卒，子句践立，是为越王。

《文献通考》：宋大观四年九月十二日，诏封颜祖富阳侯。成化《杭州府志》：颜祖，字子襄，孔子弟子。

《唐书·宰相世系表》：越王无疆为楚所灭，子蹄更封于乌程山之阳，为欧阳亭侯，遂以为氏。

汉

《史记·东越列传》：东海王摇，越王句践之后，姓驺氏。汉孝

惠三年，举高帝时越功，曰闽君摇功多，其民便附，乃立摇为东海王，都东瓠，世俗号为东瓠王。按：汉东瓠，今温州府。

《太平寰宇记》：《舆地志》云：汉文帝封东海王摇之子期视为顾余侯。至县，坐酎金失国。《嘉兴府图记·文士传》：句践支庶，封于顾邑。

《汉书·王子侯表》：富春侯元，河间孝王子，元狩二年四月封。按：汉富春，今富阳县。

谨按：封爵，自汉以后俱依历代史例，先叙王子、宗室于前，而后复以异姓功臣编年詮次。

《汉书·闽粤王传》：上遣楼船将军出武林。元封元年冬，入东粤。东粤素发兵距崦，使徇北将军败楼船军数校尉，杀长史。楼船军卒。钱唐棖终古斩徇北将军，为语儿侯。按：汉语儿，今石门县地。

《后汉书·度尚传》：抗徐，字伯徐，丹阳人。为中郎将宗资别部司马，击大山贼公孙举等，破平之，封乌程东乡侯。

《后汉书·朱隽传》：黄巾赵弘据宛城，隽击斩之。余帅韩忠复据宛拒隽，隽大破之。忠余众孙夏还屯宛中，隽急攻之，贼遂解散。增邑五千，更封钱唐侯。详见《武功》。

三国

《吴志·孙坚传》：坚，富春人。区星攻围城邑，以坚为长沙太守，克破星等。周朝、郭石亦帅徒众起于零、桂，与星相应，遂越境寻讨，三郡肃然，封乌程侯。详见《武功》。

《吴志·孙策传》：袁术僭号，策以书责而绝之。曹公表策为讨逆将军，封吴侯。详见《武功》。

嘉泰《会稽志》：三国时，孙策、孙权皆尝封会稽王，孙氏之有江左，实本于此。

《吴志·孙策传》：权追谥策桓王，封子绍为吴侯，后改封上虞侯。绍卒，子奉嗣。

《吴志·孙韶传》：韶，字公礼，本姓俞氏，吴人。孙策赐姓为孙，列之属籍。权为吴王，迁扬威将军，封建德侯。

《吴志·张昭传》：昭，字子布，彭城人。黄初二年，权为吴王，拜昭为绥远将军，封由拳侯。按：吴由拳，今嘉兴县地。

成化《杭州府志》：郭成，富春人。吴拜武义校尉，迁黄门侍郎，封永兴、富春二县侯。按：吴永兴，今萧山县。

《吴志·朱桓传》：桓，字休穆，吴郡吴人。孙权为将军，桓除余姚长，迁荡寇校尉。丹阳、鄱阳贼起，桓督领诸将，应皆平定，封新城亭侯。黄武元年，曹仁遣子泰攻濡须，桓身自拒泰，权嘉桓功，封嘉兴侯。

《吴志·朱治传》：治，故鄣人。黄武元年，封毗陵侯。二年，拜安国将军，徙封故鄣。详见《武功》。按：吴故鄣，今安吉州。

《吴志·朱然传》：黄武元年，拜征北将军，封永安侯。详见《武功》。按：吴永安，今武康县。

《吴志·全琮传》：琮，钱唐人。黄武元年，迁绥南将军，封钱唐侯。详见《武功》。

《吴志·陆凯传》：凯，字敬风，吴郡吴人。五凤二年，封都乡侯。孙皓立，进封嘉兴侯。

至元《嘉禾志》：陆祗，字元容，凯子。迁黄门侍郎，封海盐侯。

谨按：《海盐县图经》云：仇志载：汉封功臣卫胙为武原侯，代共王子蒯彻更封武原侯；唐封右武卫将军长孙裕为平原公；宋封李正民平原县伯。今考海盐之为平原，虽见《吴越春秋》，然非郡县乡亭之名可为封土称者。唐、宋两封，当是今山东之平原，况宋代五等爵尤属虚衔乎？至武原两封亦不应混收。汉县自有武原，在彭城郡。若蒯侯之武原，《汉书》名标其地属河西郡，入之尤误，今并删去。

《吴志·虞翻传》：翻十一子，第四子汜最知名。注：《会稽典录》：汜以讨扶严功拜交州刺史、冠军将军、余姚侯。详见《名臣》。

《吴志·贺齐传》：齐，会稽山阴人。建安二十一年，鄱阳民尤

突受曹公印绶，化民为贼。陵阳、始安、泾县皆与突相应。齐讨破突，余党震服，三县皆降。拜安东将军，封山阴侯。详见《武功》。

《三国志》注：孙皓即位，诏曰：故仆射屈晃志匡社稷，忠谏忘身，封晃子绪为东阳亭侯。

《吴志·孙休传》：永安元年冬十月壬午，长水校尉张布辅导勤劳，以布为辅义将军，封永康侯。

《严陵志》：陈恢，字子厚，桐庐人。富阳侯硕之子，仕至黄门侍郎，封余杭侯。

晋

《晋书·济南王遂传》：遂，字子伯。宣帝弟。仕魏，封平昌亭侯。按：晋平昌，今遂昌县。

《晋书·平原王幹传》：幹，字子良。少以公子魏时封安阳亭侯。按：晋安阳，今瑞安县。

《晋书·乐安王鉴传》：鉴，字大明。初封临泗亭侯。武帝践阼，封乐安王。薨，子殇王籍立，无嗣，齐王冏以子冰绍鉴后。按：晋乐安，今仙居县。

《晋书·楚王玮传》：玮，字彦度。武帝第五子。初封始平王。按：晋始平，今天台县。

《晋书·会稽王传》：简文帝子，会稽文孝王道子，出后琅邪孝王。年十岁，封琅邪王，摄会稽国五万九千一百四十户。

谨按：元帝中兴，初以皇子昱为琅邪王，即简文帝也。咸和初，徙封会稽。废帝即位，以会稽王摄行琅邪国祀。简文帝登阼，琅邪王无嗣，封少子道子为琅邪王。道子后为会稽王。

《晋书·河间王颙传》：永嘉初，诏以彭城元王植子融为颙嗣，改封乐成县王。按：晋乐成，今乐清县。

《晋书·裴楷传》：楷，字叔则。杨骏诛，以姻亲坐，去官。卫瑾称楷真正不阿附，宜蒙爵土，乃封临海侯，食邑二千户。

《晋书·荀勗传》：勗，字公曾，颍川人。为安阳令，有遗爱。文帝即位，以勗为侍中，封安阳子，邑千户。按：晋安阳，今瑞安县。

《晋书·侯史光传》：史光，字孝明，东莱掖人。封关中侯。泰始初，持节循省风俗，还，奏事称旨，进爵临海侯，子元嗣。

《晋书·周玘传》：玘，字宣佩，义兴阳美人。处之子。元帝初镇江左，吴兴人钱璜来寇，玘讨之，定江南。帝嘉其勋，封乌程县侯，进爵为公，禄秩僚属一同开国之例。子颺嗣。

《晋书·周札传》：札，字宣季。玘之弟。以讨钱璜功，赐爵漳浦亭侯。徐馥平，录前后功，改封东迁县侯。兄子赞，武康县侯；次兄子颺，乌程公。

《晋书·周馥传》：馥，字祖宣，汝南安成人。浚从父弟。代刘隗为镇东将军，讨陈敏，灭之，以功封永宁伯。按：晋永宁，今永嘉县。

《晋书·顾荣传》：荣，字彦先，吴国吴人。以讨葛旆功，封嘉兴伯。及帝为晋王，追封为公，开国，食邑。

《晋书·薛兼传》：兼，字令长，丹阳人。东海王越引为参军，转祭酒，赐爵安阳亭侯。元帝为安东将军，以为军諮祭酒，稍迁丞相长史。甚勤王事，进爵安阳乡侯。

《晋书·孔愉传》：愉，会稽山阴人。建兴初，以讨华轶功，封余不亭侯，子闾嗣。详见《名臣》。按：晋余不，今德清县地。

《晋书·徐广传》：广，字野民，东莞姑幕人。义熙初，封乐成侯。

《水经注》：谢勗，吴郡太守，封兰亭侯。按：晋兰亭，今山阴县地。

《严陵志》：方操，字持志，淳安人。孔群尝奏操执心正直，积德慈仁。累官谏议大夫、尚书仆射，封上虞县公。

《长兴县志》：钱宠，字士惊，东迁县开国侯。按：晋东迁，今乌程县。

南北朝

《宋书·临海王子项传》：项，字孝烈，孝武第七子。大明四年，封历阳王，食邑二千户。五年，改封临海王，户邑如故。

《南史·宋·始平孝敬王子鸾传》：子鸾，字孝羽，孝武第八子。大明四年，封襄阳王。寻改封新安。明帝即位，改封始平。按：宋始平，今天台县。

《南史·宋·永嘉王子仁传》：子仁，字孝猷，孝武第九子。大明五年封。

《南史·宋·刘粹传》：粹，字道冲，沛郡萧人。从宋武帝平建邺，征广固，以功封西安县五等侯。

《南史·宋·蔡兴宗传》：兴宗，字兴宗。济阳考城人。明帝定大事，赭圻平，封始昌县伯，固辞，许之。封乐安县伯，国秩吏力，终以不受。按：宋乐安，今仙居县。

《南齐书·巴陵王昭秀传》：昭秀，字怀尚，太子第三子。郁林即位，封临海郡王，二千户。

《南齐书·桂阳王昭粲传》：昭粲，太子第四子。郁林立，以皇弟封永嘉郡王。

谨按：临海、永嘉二王封以郁林即位之十一月辛亥。其明年，建元隆昌。

《南齐书·崔慧景传》：慧景，字君山，清河东武城人。太祖受禅，封乐安县子，三百户。按：齐乐安，今仙居县。

《梁书·陈庆之传》：庆之，字子云，义兴国山人。以功除右卫将军，封永兴县侯，邑一千五百户。按：梁永兴，今萧山县。

《梁书·王僧辩传》：僧辩，字君才。太原祁人。侯景遁，旋军夏首。世祖策勋行赏，以僧辩为征东将军、开府仪同三司、江州刺史，封长宁县公。逆平，世祖即位，以功进授镇卫将军、司徒，改封永宁县公，食邑五千户。按：梁永宁，今永嘉县。

《南史·梁·王琳传》：琳，山阴人。齐孝昭令镇寿阳，除骠骑

大将军、开府仪同三司、扬州刺史，封会稽郡公。详见《忠臣》。

《南史·梁·庾肩吾传》：肩吾，字慎之。新野人。历江州刺史，领义阳太守，封武康县侯。

至元《嘉禾志》：苏举，字子羽，封乌程侯。

《南史·陈·南康王昙朗传》：昙朗，武帝母弟忠壮王休光之子。休光少倜傥，有大志，梁简文在东宫，深被知遇。敬帝即位，追赠南徐州刺史，封武康县公，邑一千户。

《陈书·临海王叔显传》：叔显，字子明，高宗第三十子。至德四年，立为临海王。

《陈书·新昌王叔荣传》：叔荣，字子彻，高宗第三十三子。祯明二年，立为新昌王。

《南史·陈·吴兴王承业传》：承业，后主长子。宣帝十年，封永康公。后主即位，为皇太子。祯明二年，废为吴兴王。按：陈吴兴，今湖州府。

《南史·陈·永嘉王彦传》：彦，字承懿，后主第三子。至德元年立。

《南史·陈·会稽王庄传》：庄，字承肃，后主第八子。至德元年立。

谨按：会稽王，《陈书·后主本纪》：以至德四年夏五月丁巳立。

《南史·陈·东阳王怱传》：怱，字承厚，后主第九子。祯明二年立。

《南史·陈·钱塘王恬传》：恬，字承憺，后主第十一子。祯明二年封。

《陈书·周文育传》：文育，字景德，阳羨人。累前后功，封东迁县侯，进爵寿昌县公，子宝安嗣。

《陈书·程灵洗传》：灵洗，字元涤，新安人。绍泰元年，平徐嗣徽有功，封遂安县侯。

《南史·陈·钱道戢传》：道戢，吴兴长城人。随文帝平张彪于

会稽，以功封永嘉县侯。详见《武功》。

谨按：永嘉，《陈书》作永安。

《南史·陈·骆文牙传》：文牙，吴兴临安人。陈文帝为吴兴太守，引为将帅，从平杜龛、张彪，勇冠众军。文帝即位，封临安县侯。详见《武功》。

谨按：骆文牙，《陈书》作骆牙，《文献通考》作骆文。临安，《陈书》作常安，今并依南史。

《陈书·裴忌传》：忌，字无畏，河东闻喜人。天嘉五年，封东兴县侯。太建元年，授东阳太守，封乐安县侯，邑一千户。按：陈乐安，今仙居县。

《陈书·张种传》：种，字士苗，吴郡人。仁恕寡欲，虽历居显位，而家产屡空。太建初，累赐无锡、嘉兴侯秩。

《陈书·孙瑒传》：瑒，字德珽，吴郡吴人。王僧辩讨侯景，瑒为戎昭将军，力战有功，封富阳县侯，邑一千户。

《陈书·萧济传》：济，字孝康，东海兰陵人。预平侯景，功封松阳县侯，邑五百户。

隋

《隋书·河间王弘传》：弘，字辟恶，高祖从祖弟。有文武幹略，数从征伐，累迁开府仪同三司，赐爵永康县公。及上受禅，进爵郡公。

《隋书·卫昭王爽传》：爽子集，字文会，初封遂安王。

《隋书·萧该传》：该，鄱阳王恢之孙。开皇初，赐爵山阴县公。

《隋书·越王侗传》：侗，字仁谨。美姿仪，性宽厚。大业二年，立为越王。

《隋书·韦冲传》：冲，字世冲。京兆杜陵人。高祖践阼，征为散骑常侍，进位开府，赐爵安固县侯。按：隋安固，今瑞安县。

《隋书·杨文思传》：文思，字温才。弘农华阴人。周拜车骑大

将军，从武帝攻拔晋州，以勋进授仪同三司，封永宁县公。按：隋永宁，今永嘉县。

《隋书·令狐熙传》：熙，字长熙，敦煌人。开皇八年，为河北道行台。及行台废，以熙为汴州刺史。考绩为天下最，征拜桂州总管十七州诸军，累封武康郡公。

《隋书·樊子盖传》：子盖，字华宗，庐江人。解褐武兴王行参军，出为东汝、北陈二郡太守，封富阳县侯，邑五百户。

《隋书·陈稜传》：稜，字长威，庐江襄安人。杨元感之乱，稜率众万余人击平黎阳，斩元感，以功进位光禄大夫，赐爵信安侯。按：隋信安，今衢州府。

《隋书·周法尚传》：法尚，字德迈，汝南安成人。少果劲有风槩，为陈始兴王中兵参军，寻加伏波将军。数有战功，封山阴县侯，邑五千户。

《唐书·宰相世系表》：高勣，字敬德，隋洮州刺史，乐安侯。按：隋乐安，今仙居县。

唐

《旧唐书·淮安王神通传》：武德元年，拜右翊卫大将军，封永康王。

《唐书·高祖本纪》：武德四年夏四月甲寅，封子元茂越王。

《旧唐书·吴王恪传》：恪，太宗第三子。武德十年，封吴王。恪子琨，琨子祹，景云十二年，封信安郡王。按：唐信安，今衢州府。

《旧唐书·濮王泰传》：泰，字惠褒，太宗第四子。封宜都王，进封卫王。贞观二年，改封越王。

《旧唐书·越王贞传》：贞，太宗第八子。贞观五年，封汉王。十年，徙封越王，赐实封八百户。二十三年，加实封满千户。

《旧唐书·济王瓌传》：瓌，元宗第二十二子。天宝末，子傖为永嘉郡王。

《旧唐书·泾王侔传》:侔,肃宗第七子。天宝中,封东阳郡王。

《唐书·郁林王恪传》:恪子琨,琨子祎,祎子峘,以王孙封赵国公。上皇还京,迁户部尚书,改越国。

《旧唐书·越王係传》:係,肃宗第二子。封赵王。乾元三年,改封越王。

《旧唐书·睦王述传》:述,代宗第四子。大历十年二月,诏封睦王。按:唐睦州,今严州府。

《旧唐书·代王誤传》:誤,德宗第八子。封缙云郡王。

《旧唐书·澧王恽传》:恽,宪宗第二子。长子汉,东阳郡王。第三子演,临海郡王。

《旧唐书·深王惊传》:惊,宪宗第四子。次子淑,吴兴郡王。按:唐吴兴,今湖州府。

《唐书·穆宗本纪》:长庆元年三月戊午,封弟恠婺王,懽衢王。

《唐书·懿宗本纪》:咸通十三年四月庚子,封子倚睦王。

《唐书·宗室世系表》:小郑王房:乐安郡王珪。道王房:信安郡公诩。江王房:永嘉郡王晫。滕王房:临海郡公修。珍纪王房:乐安县公、衡州别驾恣。惠宣太子房:乐安郡王瑗。按:唐乐安,今仙居县。

《唐书·宰相世系表》:裴之隐,梓州长史,会稽男。

《唐书·宰相世系表》:杜敬同,中书舍人,东阳公。

《唐书·宰相世系表》:张震,左卫灵池府折冲都尉,富阳县公。

《唐书·宰相世系表》:孙佖,延州刺史,富春男。俊,荆府长史,乐安子。佺,幽州都督,会稽公。成,字思退,桂州刺史,乐安男。储,字文府,京兆尹,乐安郡侯。

《唐书·宰相世系表》:钟嘉谔,太子典膳郎,山阴县公。

《唐书·宰相世系表》:王升朝,检校、太子宾客,乐安郡王。

《唐书·李思行传》:思行,赵州人。唐公将起,授左三统军。从破霍邑,平京师,擢累嘉州刺史、乐安郡公。

《唐书·李安远传》：安远，夏州人。数从秦王征讨，积功累封至广德郡公，追封遂安郡公。

《唐书·李靖传》：靖，字药师，京兆三原人。萧铣据江陵，靖陈图铣十策，拜行军总管。武德四年，靖击破之，以功封永康县公。兄端，字药王，以靖功袭永康公。

《唐书·窦德元传》：以德远永及爵，愿分封。诏可，封德远乐安男。

《唐书·虞世南传》：世南，越州余姚人。秦王践阼，拜秘书监，封永兴县子。贞观八年，进封县公。详见《名臣》。按：唐永兴，今萧山县。

《旧唐书·高宗本纪》：麟德二年，嘉兴县子陆敦信为检校、右相。

《唐书·元行冲传》：澹，字行冲，以字显。后魏常山王素莲之后，四迁大理卿，不乐法家，固谢所居官，改左散骑常侍，封常山县公。

《唐书·李愔传》：武德以来，宰相及实封功臣，史馆考勋名特高者九十二人，以三等条奏。守侍中、同中书门下三品兼太子右庶子、常山县男李日知，潭州都督、吴兴郡公沈叔安第二。

《唐书·钟绍京传》：绍京，虔州赣人。景龙中，讨韦氏难，绍京帅户奴丁夫从。事平，拜中书令、越国公，实封五百户。

《唐书·马怀素传》：怀素，字惟白，润州丹徒人。开元初，为户部侍郎，封常山县公。

《唐书·崔纵传》：纵，博陵人。贞元元年，为太常卿，封常山县公。

《唐书·陆扈传》：扈，字祥文。宰相赞族孙，客于陕，遂为陕人。累为尚书左丞，封嘉兴县男。

《唐书·归崇敬传》：崇敬，字正礼，苏州吴人。德宗立，拜国子司业，迁翰林学士、左散骑常侍，封余姚郡公。

《唐书·康日知传》：日知，灵州人。累检校、尚书左仆射，封会稽郡王。子志睦，字得众。李同捷反，志睦挫其锐不得逞，加检校、尚书左仆射，徙泾原，封会稽郡公。子承训，字敬辞，为天德军防御使。党项破射雕军洛源镇，悉俘其人。闻承训威政，皆还俘。诏检校、工部尚书，封会稽县男。

黄潛《危府君墓志》：唐危全諷居抚之南城，当江淮寇盗充斥之时，合乡人立壁垒以自卫，大破贼兵。朝廷因命以官金紫光禄大夫、检校、司徒，守抚州刺史兼御史大夫、上柱国，钱塘县开国男。

《括苍汇纪》：施约谄仕至银青光禄大夫、检校、太子宾客兼监察御史，封东阳郡公。弟约言仕至迎卫镇遏都知兵马副使、银青光禄大夫，封缙云郡公。

五代

《五代史·吴越世家》：钱鏐，临安人。唐天复二年，封越王。天祐元年，封吴王。梁太祖即位，封吴越王，兼淮南节度使。唐庄宗入洛，赐鏐玉册金印，鏐因以镇海等军节度授其子元瓘，自称吴越国王。卒年八十一。子元瓘立。《吴越备史》：龙德三年春二月，敕遣兵部侍郎崔协、刑部员外郎夏侯昭册封王为吴越国王。受封册建国之仪一如典礼。详见《武功》。

《五代史·吴越世家》：元瓘袭封吴越国王，玉册金印皆如鏐故事。天福六年，卒。子佐立。

《五代史·吴越世家》：佐袭封吴越国王，玉册金印皆如元瓘。开运四年，卒。弟俶立。

《五代史·吴越世家》：俶历汉周，袭封吴越国王。宋兴，俶倾国以事贡献。太祖时，来朝，厚礼遣还国。太平兴国三年，俶举族归京师，国除。以上俱详见《武功》。

嘉靖《安吉州志》：吴越吴衡余杭侯。

宋

《宋史·魏王廷美传》：克巳子叔韶，字君和。终和州防御使，赠会稽郡公。

《宋史·燕王德昭传》：德昭，字日新。太平兴国四年，追封魏王，后改吴王，又改越王。子惟吉，惟吉子守巽，守巽子世清，熙宁中袭封越国公，进会稽郡王。子令廓嗣。

《宋史·汉王元佐传》：元佐子允升，允升子宗悌，字元发。终明州观察使，赠保宁军节度使、东阳郡王。允言，赠明州观察使，奉化侯。

《宋史·商王元份传》：太平兴国八年，拜同平章事，封冀王。雍熙三年，加兼侍中、威武军节度使，进封越王。子允宁，字德之，武定军节度使。景祐元年，卒，赠太尉、信安郡王。按：宋信安，今衢州府。

《宋史·越王元杰传》：元杰，字明哲，初名德和。赠太尉、尚书令，追封陈王。徽宗即位，改封越王。

《东都事略》：周王元俨子允迪，赠永嘉郡王。

《宋史·濮王允让传》：宗汉，英宗幼弟，累拜保宁军留后，东阳、安康郡王。

《宋史·吴王颙传》：颙，字仲明。治平元年，加检校、太傅、保宁军节度使、同中书门下平章事，封东阳郡王。

《宋史·越王偁传》：神宗第十二子。哲宗朝，加开府仪同三司，封永宁郡王，进封睦王。徽宗朝，进封越王。

《东都事略》：莘王植，宣和四年，封信安郡王。

《宋史·秀王子偁传》：子偁，秦康惠王之后，高宗族兄。孝宗既为太子，加赠太师、中书令，封秀王，谥安僖。嗣秀王伯圭，字禹锡，孝宗同母兄。光宗即位，封嗣秀王。子师揆袭封。卒，弟师禹袭封。《理宗本纪》：端平二年十一月戊午，诏嗣秀王师弥授少师。

《宋史·魏王恺传》：子柄，庆元间封吴兴郡王。按：宋吴兴，今湖州府。

《宋史·理宗本纪》：端平元年正月丙寅，诏太师、中书令、荣王父师意，赠太师、越国公。

《宋史·度宗本纪》：咸淳七年十月丙申，少傅、嗣秀王与泽薨，诏赠少师，追封临海郡王。

《宋史·宗室世系表》：燕王房：东阳侯世敞，东阳侯世穹，东阳侯世职，东阳郡王令璿，武德军节度使、奉化郡王令缉，东阳郡公令枢，赠东阳侯令揭，赠奉化郡公令潜，赠奉化侯令夫，东阳侯令率，赠吴兴郡公令查，赠奉化侯令壶。秦王房：奉化侯世传，平阳侯世法，吴兴侯世经，东阳郡公世复。汉王房：东阳郡王宗悌，东阳郡公宗辨，东阳侯宗迥，东阳郡公仲瑗，婺国公仲革，按：宋婺州郡，今金华府。东阳侯士稹，奉化侯士隼，东阳侯士琫，奉化侯士岑，东阳侯士鯁，东阳侯士韬。商王房：信安郡王允宁，会稽侯宗敏，余杭郡王宗球，东阳侯仲塾，东阳郡公仲晔，越国公士欢，吴兴侯士列，赠昭庆军节度使、会稽郡王士嵩，会稽郡公士宥，赠太师、新定郡王士钱，按：宋建德府，本新定郡，今严州府。赠少师、永嘉郡王士程，赠少师、集庆军节度使、东阳侯士谥，赠明州观察使、奉化侯士逊，吴兴郡公士倬，赠宁国军节度使、奉化侯士蓐，东阳郡公士陪，赠婺州观察使、东阳侯士踦，赠保信军节度使、东阳侯士覲，赠琼州观察使、东阳侯士赫，赠明州观察使、奉化侯士阐。越王房：赠越州观察使、会稽侯士穫。镇王房：奉化郡公仲虺。楚王房：东阳郡公仲烈。周王房：永嘉郡王允迪，东阳侯仲速，东阳侯仲兕，奉化侯仲畬，赠明州观察使、奉化侯士褒。高密郡王房：东阳侯叔嫣。广平郡王房：东阳郡公叔昂，临安侯叔肸，奉化侯叔刍。颍川郡王房：东阳郡公克聪。广陵郡王房：昌化侯承嗣，东阳侯克慕，奉化侯叔晰。郕国公房：东阳侯承鉴，永嘉郡王克端。申公房：奉化郡公克贤，奉化郡公克艰，奉化郡公叔韦。经国公房：越国公克畅。